

# DOMENIE XXVIII «VIE PAL AN»

## Jutoris pe Liturgjie

Domenie, ai 14 di Otubar dal 2018

*O pensi che ducj o ricuardin il fat di S. Antoni abât, o dal desert, o dai purcits, (Egjit, 251-357) che di zovin al jere stât cjapât des peraulis dal vanzeli: Se tu vuelis jessi perfet, va, vent ce che tu âs, e dalu ai puars (Mt 19, 21). Vuê Marc al zonte: po ven daûr di me.*

*Antoni, che al jere siôr, al donà dut ai puars e si ritirà in preiere tal desert. Al diventà mestri e guide tal spirt di personis a no finî. La sô spirtualitât e rivà fin a la nestre glesie di Aquilee e daspò in dut l'Occident.*

*Ma chel: va, vent ce che tu âs, nol aparten dome a S. Antoni, o ai eremits o a determinâts ordins religjôs. Di fat i nestris paris no molavino dut lant tes Gjermaniis par nudrî i fis? E une famee li che al rive un frut disabil no donie dute se stesse par chel frut? E tropis personis fasino une strade li che a àn pierdût dut o che no volaressin fâ? Se chest lu vivin tal spirt dal Signôr - ven daûr di me - a son i nestris S. Antoni di vuê.*

*L'invît di Gjesù va, vent ce che tu âs, al rive a ducj, dome che ognidun al à di domandâsi ce impediments che al à di tirâ vie par lâ daûr al Signôr; al è il fat che i insegnaments dal vanzeli par purificânus nus fasin metisi cuintri di nô stes - che al rinei se stes (Mt 16, 24). Chest nus al sclarissarà ben la seconde leture di vuê.*

### Antifone di jentrade

Sal 129,3-4

**Se** tu tegnîs cont, Signôr, de tristerie, cui rivaraial a parâsi?  
Ma li di te si cjate misericordie, Diu di Israel.

### Colete

La tô gracie, Signôr, ti prein,  
ch'e cjamini simpri denant di nô e nus compagni,  
e nus fasi jessi saldo impegnâts intes oparis.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

Sap 7,7-11

**A preference de sapience o ai calcoladis lis ricjecis un nuie.**

*Come che nus disarà il vanzeli, il nestri cûr al pò sedi tacât a lis ricjecis dal mont, il baston di comant - lis sentis dai rês - piere preziose - aur - arint... che a son savalon e pantan metudis a paragon cul spirt de sapience. Ma chesj a son discors masse alts par nô; S. Pauli al scrîf: l'om naturâl nol pò capî... par lui a son rude matetât (cfr. 1 Cor 2,14).*

*L'autôr dal libri de Sapience nus insegue la strade par rivâ a comprendi: O ai preât... o ai suplicât... e al è rivât il spirt de sapience.*

### Dal libri de Sapience

O ai preât, e mi è stade dade l'inteligence;  
o ai suplicât, e dentri di me al è rivât il spirt de sapience.  
Le ai preferide ai bastons dal comant e a lis sentis dai rês  
e o ai calcoladis lis ricjecis un nuie a preference di jê;  
no ai metude a pâr di jê la piere plui preziose,  
parcè che dut l'aur, denant di jê, al è un pugn di savalon,  
e tant che pantan al sarà stimât denant di jê l'arint.  
I ai volût plui ben che no a la salût e a la bielece,  
o ai preferît di vêle impen de lûs,

parcè che il sflandôr ch'al salte fûr di jê nol va a mont.  
Insieme cun jê mi son vignûts ducj i bens  
e tes sôs mans a son ricjecis  
che no si rive nancje a misurâlis.  
Peraule di Diu.

### SALM RESPONSORIÂL

dal Salm 89

*Il salm dut intîr (Salteri n.90) al è une profonde riflession sore des nestrîs zornadis e agns che nus scjampin di man, sore de eterne debolece umane e sore chel cjatâ e dâ un significât al nestrî vivi.*

*Scrutinant in dut chest, nus ven naturâl il ritornel dal salm:*

#### **R. Danus, Signôr, la sapience dal cûr.**

*Se cjantât: Il cjant dai salms reponsoriâi, p. 165.*

Insegninus a contâ i nestrîs dîs,  
e cussî o podarìn rivâ a la sapience dal cûr.  
Voltiti, Signôr; fînt cuant mo...?  
Ve dûl dai tiei servidôrs. **R.**

Saciinus a buinore cu la tô gracie,  
e o gjoldarìn in contentece par ducj i nestrîs dîs.  
Torninus la ligrie pai dîs che tu nus âs batûts,  
par rifondinus des anadis  
ch'o vin viodudis dome disgraciis. **R.**

Ch'a puedin viodi i tiei fameis dutis lis tôs voris  
e che si slargji la tô glorie parsore dai lôr fis.  
Ch'al sedi sore di nô il boncûr dal Signôr nestrî Diu.  
La vore des tôs mans par nô rinfuarce. **R.**

### SECONDE LETURE

Eb 4,12-13

**La peraule di Diu e scrutine lis ideis e i pinsîrs dal cûr.**

*Se la peraule di Diu no nus cambie dentri e no miliore lis nestrîs comunitâts, al vûl dî che le vin ridusude di vive a muarte, di fuarte a debule, di spade a dopli tai a un peçot. Dome se nus cambie denri e e miliore lis nestrîs comunitâts, o sin sigûrs di vêle cjatade e o sin compagn di un marcjadant intivât tune perle di grant valôr (cfr. Mt 13, 45-46).*

#### **De letare ai Ebreos**

Fradis, la peraule di Diu e je vive, fuarte, e e çoncje plui di ogni spade a dopli tai; e va in dentri fintremai là che si zontin la vite e il spirt, lis comissuris e la medole, e e scrutine lis ideis e i pinsîrs dal cûr. No 'nd è creature ch'e puedi platâsi denant di lui, ma dut al è crot e distaponât pai siei vôi e a lui o vin di rindii cont.  
Peraule di Diu.

### CJANT AL VANZELI

cf. Ef 1,17-18

#### **R. Aleluia, aleluia.**

Il Pari dal Signôr nestrî Gjesù Crist  
che nus dedi un spirt di sapience  
par che o podin rivâ a capî  
cuale ch'e je la sperance de nestre clamade.

#### **R. Aleluia.**

Vent dut ce che tu âs, po ven daûr di me.

*Tal scoltâ chest vanzeli o podìn ricuardâsi di Marie, une semplice femine di paîs, che si sentà dongje dai pîts dal Signôr e e stave a scoltâ ce che al diseve (Lc 10, 39). Fasìn come Mariute ancje nô e Lui nus contarà che: Un i corè incuintri... Mestri bon ce aio di fâ... Va, vent dut... Dut avilît... Ce dificil che al è... Nol è nissun... e ancje nus cisicarà ce che al vûl dî par nô dut chest e nus pandarà il so invît: ven daûr di me.*

### Dal vanzeli seont Marc

In chê volte, intant che Gjesù al stave saltant fûr su la strade, un i corè incuintri, si butà denant dai siei pîts e i disè: «Mestri bon, ce aio di fâ par vê la vite eterne?». I rispuindè Gjesù: «Parcè mi clamistu bon? Nissun nol è bon, fûr di un sôl: Diu. Tu cognossis pûr i comandaments: No sta copâ, no sta fâ adulteri, no sta robâ, no sta testimonear il fals, no sta imbroiâ, onore to pari e tô mari».

Ma chel i rispuindè: «Mestri, dutis chestis robis jo lis ai rispietadis di frut in sù». Alore Gjesù, cjalantlu cun afiet, i disè: «Ti mancje dome une robe. Va, vent dut ce che tu âs, daural ai puars e tu varàs un tesaur tal cîl; po ven daûr di me». Sintint cussì, però, chel al fasè muse serie e si 'nt le dut avilît, parcè che al veve une vore di robe.

Alore Gjesù, cjalant ator, ur disè ai dissepui: «Ce dificil ch'al è pai siôrs jentrâ tal ream di Diu!».

I dissepui a restarin scaturîts di chestis peraulis; ma Gjesù, tornant a cjapâ la peraule, ur disè: «Fîs miei di cûr, ce dificil ch'al è jentrâ tal ream di Diu! Al è plui facil che un camêl al passi pe buse di une gusele, che no che un siôr al jentri tal ream di Diu». E chei, scaturîts in mò di plui, si cisicavin un cul altri: «E cui rivial alore a salvâsi?». Ma Gjesù, cjalantju, ur disè: «Pai oms al è impussibil, ma no par Diu. Par Diu, di fat, al è pussibil dut».

Alore Pieri al tacà a dî: «Ve: nô o vin bandonât dut e o sin vignûts daûr di te». I rispuindè Gjesù: «Us al dîs in veretât: Nol è nissun ch'al vedi bandonât cjase o fradis o sùrs o mari o pari o fîs o cjamps par colpe mê e dal vanzeli, che nol cjapi cumò, in chest timp culi, cent voltis tant in cjasis, fradis, sùrs, maris, fîs e cjamps, insieme cu lis persecuzions, e la vite eterne tal mont a vignî».

Peraule dal Signôr.

### Su lis ufiertis

Acete, Signôr, lis preieris dai fedêi  
dutine cu l'ufiarte dal sacrifici,  
par che, in grazie di chest at di sante religjon,  
o podìn rivâ a la glorie dal cîl.  
Par Crist nestri Signôr.

### Antifone a la comunion

Sal 33,11

I grancj a son colâts in miserie e la fan a patissin,  
ma chei che si avodin al Signôr no ur mancje propit nuie.

### O ben:

1 Zn 3,2

Cuant che il Signôr si pandarà,  
nô o sarin sul so stamp,  
parcè che lu viodarìn come ch'al è.

### Daspò de comunion

O suplichìn umilmentri la tô maiestât, Signôr,  
par che tu nus fasis vê part de vite divine  
come che tu nus nudrissis cul sant sostentament dal Cuarp e dal Sanc.  
Par Crist nestri Signôr.

## **Riflession** di pre Antoni Beline: **Salvâsi al è un don di Diu**

And'è tantis robis di meti riflès in chest toc di vanzeli. O cirarìn di strucâ alc, par che al resti. Prin di dut vin di vêi agrât a di chel siorut che al à fate une domande une vore impuartant ancje par nô: "Mestri bon, ce aio di fâ par vê la vite eterne?". E Gjesù i da une rispueste complete...

*Vanzeli par un popul, an B, p. 168*

\* \* \*

## **Cjants**

*Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.*

\* \* \*

*A son oms che no àn nuie / ni ricjece ni bravure: / dut il mont ju à smenteâts, /  
ma il Signôr ju à clamâts furtunâts!*

*A son oms che la cariere / e l'onôr e ce che al jere / pe justizie àn ruvinât, /  
ma il Signôr ju à clamâts furtunâts!*

*A son oms di cheste fate / a son pôcs, però s'int cjate; / àno lôr reson o tuart? /  
Il Signôr ju à clamâts furtunâts.*

Dal libri Hosanna, n. 94

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*